

## Was merr su babbeld

Was mächsden alls doorum?  
 Ich such moi Schlabbe. Wo sinnen die?  
 Frächst du misch?  
 Ei wen donn sunnst.  
 Ah ja. Was suchsde?  
 Moi Schlabbe – wo sinnen die?  
 Ei dess waaß isch doch nitt.  
 Die stiehn immer doohinne unnerm Stuhl.  
 Doo werrn se aach jetz widder soi.  
 Naa, doo sinnse nitt. Waaßde nitt wo se sinn?  
 Naa – ich habbse nitt oogehabbd.  
 Ich stell die immer doo hie. Du host ...  
 Ich habb gar nix.  
 Villeischd beim Butze odder Sauermache?  
 Wonn hosden die zum letzde Mol oogehabbd?  
 Ei gestern Owend.  
 Villeischd hosde se im Bad?  
 Naa, habb ich nitt. Wo sinn moi Schlabbe!  
 Ich haddse nitt oo, ess sinn doi Schlabbe.  
 Jetz emol longsom. Ich stell die immer ...  
 Unn ich loss se immer dort stieh.  
 Nor heit nitt. Sie sinn fort.  
 Ich waaß nitt wo se sinn.  
 Du waaßt aach werklisch gar nix.  
 Was willsden eischendlich mett de Schlabbe?  
 Oozieh, was donn sunnst.  
 Unn donn?  
 Isch will emol in die Garaasch.  
 Was willsde dann in de Garaasch?  
 Isch such was.  
 Du suchst was. Unn was suchsde?  
 Moin Audoschlissel.  
 Doin Audoschlissel in de Garaasch?  
 Sunnst liehder immer uff de Fensterbonk.  
 Awwer heit nitt. Unn wo isser?  
 Waaßt du nitt wo er iss?  
 Naa, dess waaß isch nitt.  
 Villeischd habb isch enn im Audo stecke losse.  
 Du dust in letzder Zeit nor doorum suche.  
 Isch habb halt vill um de Kobb erum.  
 Was hosden du um de Kobb erum?  
 Ei weil isch nitt waaß was isch derr schenke soll.  
 Du willst merr was schenke?  
 Ei ja, zum Gebortsdaach.

So. Unn was willsde merr schenke?  
Dess waaß isch ewe nitt.  
Unn warum frächsde misch nitt?  
Isch soll disch frooche? Ei du waaßt joo nix.  
Jetzt heer awwer uff.  
Du waaßt joo noch nitt emol ...  
Was?  
... wo moi Schlabbe unn moi Schlissel sinn.

Eiern Honnes